

“AMA, KADAGITA IMAM, YAWATKO ‘TI ESPIRITUK’”- Lucas 23: 46
(Ti maikapito a balikas ni Jesus idi nakabissayot iti krus)

PAKAUNA

“Nagpukkaw ni Jesus iti napigsa: ‘Ama, kadagita imam yawatko ti espirituk!’ Apaman a naisao daytoy, nauyosen ti biagna.”

Naimbag nga orastayo kakabsatko iti Apo!

Kas ibingayko ti mensahe ti biag a naibatay iti maudi a balikas ni Jesus idi a nakabissayot idiyay krus, kayatko man nga estoriaen ti maysa a kapadasan:

Iti maysa a malem a nagtitiponkami kadagiti kameng ti maysa a prayer group a nakaipasetak, sinaludsodko kadakuada: “Anian ti karirigatan a pasamak a napadasanyo? Adda nagkuna, “idi natay ti asawa ken dua mga anakko gapu iti aksidente.” Kuna met ti maysa, “ti pannakapukaw ti anakko nga aginga ita ket diak pay nasapulan.” Ti maysa kunana met “idi nabaludak iti innem a tawen uray awan ti basolko.”

Ket sika kabsat, ania met ti karirigatan a pasamak a napadasan iti daytoy a biag?

Ti maudi a balikas ni Jesus idi nakalansa idiyay krus ket balikas ti naindaklan a panagtalek iti Dios. Mapapauneg ti pannakaawattayo iti daytoy no sublianantayo dagiti sumagmamano a naririgat a napadasan ni Jesus.

Ti Biblia saritaenna nga gapu iti panangaranid ni Jesus iti missionna, isiksikatda a patayen isuna (Mateo 26: 3-4; Lucas 22: 1-2). liniputanda isuna babaen iti maysa kadagiti adalanna (Mat. 26: 47-49; 27: 3). Inarestoda isuna nga uray awan ti basolna (Mateo 26: 47b, 50). Idin ta naaresto ni Jesus, pinanawanen dagiti Adalanna (Mateo 26: 56b). Ni Pedro a maysa kadagiti nasinged kenkuana, inlibakna ni Jesus iti namitlo (Mateo 26:69-75) Addada dagiti ulbod a tattao a nagsaksi kontra kenkuana (Mateo 26: 57-21). Uray awan ti basolna, sinuportaran dagiti tattao ti pannakailansana idiyay krus (Mateo 27:15-26). Uray awan ti basolna, nasentensiaan a matay. Pinarigatda a permi. Na-torture isuna. Pinagang-angawanda. Inlansada iti krus (Mateo 27: 26-44). Kadagidi a panawen, no mapapatay a mailansa ti maysa a tao iti krus, maibilang isuna a napalalo ti kinadakesna. Pudno a saan nga asiassi dagitoy a kapadasan ni Jesus.

Kabsat, Napadasan kadi metten ti naisikat a mapapatay gapu iti panagtungpalmo iti Apo? Napadasan kadi metten iti naliputan? Napadasan kadi metten ti nailibak ken napanawan babaen kadagiti gagayyemmo iti panawen nga addaka iti krisis? Napadasan kadi metten ti naaresto ken naimbestigaran gapu laeng iti panagaramidmo iti naimbag? Nabiktima ka Kadin iti ulbod a saksi? Napadasan kadi metten ti na-torture ken napabpabainan iti publiko gapu iti panagserbim kadagiti tattao kas bunga ti pammatim iti Dios? Siguro adda metten dagiti naririgat a kapadpadasan nga umarngi kadagiti kapadasan ni Jesus.

Kabsat, iti baet ti inget saem a kapadasan ni Jesus gapu iti panagtulnogna iti Amana, saanna a tinallikudan ti dakkal a panagtalekna kenkuana. Iti baet iti nakaro a tuok nga inna marikrikna, sakbay a mauyos ti angesna, imparangarangna dayta a panagtalek babaen iti nabigsa a timek, timek a maririgatan: *“Ama, kadagiti imam yawatko ti espirituk!”*

Kabsatko, aniaman ti sagsagabaem ita, aniaman dagiti nasasaem a kapadasan wenno mapadpadasan, aniaman dagiti problema nga ibakbaklaymo, aniaman dagiti riribuk a mangkiwkiwar iti panunotmo; kumpetka latta iti Apo. Itakdermo ti panagtalekmo kenkuana ket kunam: *“Ama, kadagiti imam yawatko ti espirituk!”*

Iti nagan ti Ama, Anak, ken Espiritu Santo, Amen.